

CULTURA Y HISTORIA

Aruba: Nos Rikesa

Adriaan Lacle:

E storia di e comerciante y visionario principal di Aruba

ADRIAAN Lacle, naci na 1866 na Aruba, ta conoci como un di e comerciantenan mas rico y influyente den historia di e isla. Su nomber ta sigui biba na Aruba, no solamente door di Adriaan Lacle Boulevard, un di e arterianan principal di Oranjestad cu ta carga su nomber, pero tambe door di e cantidad di propiedad y terenonan cu e tabata posee y di cual algun ainda ta existi awe.

Lacle a nace como e mayor di seis yiu den un famia rico. El a haci su nomber rapidamente como un comerciante prominente y doño di hopi tereno. Su residencia principal y centro di comercio tabata situa na Nieuwstraat, den curason di Oranjestad. E propiedad aki, cu ainda ta existi, tabata un simbolo di su exito y ta un di e poco casnan di comerciante cu a resta for di e tempo ey. Adriaan tabata haci negoshi den diferente sector, incluyendo propiedadnan inmobil y posiblemente tambe den e industria di aloe vera. Un potret di e fotografo Curasoleño Soublette ta mustre e ta drei den ketelnan grandi unda aloe tabata wordo procesa, loke ta sugeri cu e tambe tabata envolvi den e produccion di aloe of por lo menos den e makinaria p'e industria aki.

Loke tabata diferencia Lacle for di su contemporaneo, tabata su versatilidad. Banda di su rol como comerciante, e tambe tabata fungi como un tipo di bankero door di yuda hende cu prestamo. E tabata huur cantidad di propiedad y tabata doño di diferente tereno, tanto den como pafo di ciudad. Tambe e tabata un doño di barco exitoso, unda su barconan tur tabata carga nomber di su yiunan muhe, un muestra cla di su relacion estrecho cu su famia.

Riba nivel personal, Adriaan Lacle a conoce tanto alegria como tragedia. El a casa dos biaha; su prome casa a fayece poco despues di nacemento di nan prome yiu muhe. For di su di dos matrimonio a nace nada menos cu 16 yiu, di cual solamente 11 a yega edad adulto. Su yiunan hopi biaha tabata casa cu miembronan di otro famianan influyente di Aruba, specialmente e famia Arends. E matrimonionan aki a conduci na construcion di algun di e casnan mas impresionante riba e isla, manera e actual 'stadhuis' di Oranjestad, cu a wordo construi pa dokter Eloy Arends pa su casa Maria Monica Lacle.

Banda di e casnan den ciudad, Adriaan Lacle tambe a laga construi e bunita mansion Quinta del Carmen na Bubali,



aunke e mes nunca a biba den dje. E mansion aki, nombra na honor di su yiu muhe Maria del Carmen, despues a wordo uza pa fiestanan elegante y a sirbi como cas di dokter p'e hospital di e refineria Eagle. E ta keda un di e edificionan mas iconico di Aruba y ta simbolisa su rikesa y gusto refina.

Despues di su fayecimento na 1935 na edad di 69 aña, su herencia extenso a bira un reto pa su herederonan. E reparticion di su cantidad di parcela y propiedadnan a dura decadanan largo. Pa facilita e tarea compleho aki, na 1947 a wordo funda e N.V. Exploitiatiemaatschappij Erven Adriaan Lacle. Sinembargo, a dura decadanan mas prome cu tur e propiedadnan inmobil a wordo bendi.

Awendia na Aruba no tin ningun magnate mas di e caliber di Adriaan Lacle. Sinembargo, su nomber ta sigui biba, no solamente door di e boulevard cu ta carga su nomber, pero tambe door di e recuerdonan cu el a laga atras, manera e edificionan historico cu el a laga construi. Adriaan Lacle a representa un epoca di comercio grandi, lasonan familiar y construcion pa futuro, y su herencia ta un pilar importante den historia di Aruba.

Bron: www.historiadiaruba.aw